

Na osnovu člana 59. stav 1. tačka c) Zakona o visokom obrazovanju („Sl.novine TK“ broj: 8/08, 11/09, 12/09 i 13/12) i člana 75. stav (1) tačka 5) Statuta Univerziteta u Tuzli (Prečišćeni tekst), na prijedlog Unije studenata Univerziteta u Tuzli od 21.02.2013. godine, Senat Univerziteta na sjednici održanoj 03.04.2013. godine donio je

ETIČKI KODEKS STUDENATA UNIVERZITETA U TUZLI

I Opće odredbe

Član 1.

- (1) Etički kodeks studenata je skup normi ponašanja koje su dužni poštivati svi studenti Univerziteta u Tuzli (u daljem tekstu: Univerzitet).
- (2) Etički kodeks za studente proizlazi iz Statuta Univerziteta, Etičkog kodeksa nastavnika Univerziteta i predstavlja primjenu općih normi etičnosti i profesionalnosti na posebnu domenu studentskih prava i obaveza.
- (3) Studenti su dužni poštivati norme Etičkog kodeksa nastavnika Univerziteta, te norme Etičkog kodeksa studenata Univerziteta.
- (4) Studenti koji povrijede norme iz stava 3. ovog člana bit će podložni disciplinskim sankcijama nadležnih instanci.

Član 2.

- (1) Od studenata Univerziteta očekuje se da se ponašaju kao odgovorni članovi akademske zajednice poštujući zakone i propise, temeljna ljudska prava, integritet i dostojanstvo drugih osoba, akademske slobode, načela ravnopravnosti i pravednosti te da savjesno i profesionalno ispunjavaju svoje obaveze.
- (2) Prava i obaveze propisane Etičkom kodeksom studenata odnose se isključivo na radnje i ponašanje studenata na prostorima koje posjeduje, koristi ili kontrolira Univerzitet, te na radnje i ponašanje studenata izvan Univerziteta, a koje su vezane uz predstavljanje i zastupanje Univerziteta gdje spadaju i ustanove koje su partneri u ostvarivanju misije i djelatnosti koje obavlja Univerzitet.

II Prava studenata

Član 3.

(1) Univerzitet štiti i poštuje sljedeća prava studenata:

1. pravo na sudjelovanje u nastavnom procesu;
2. pravo na slobodno iznošenje i razmjenu mišljenja i uvjerenja;
3. pravo na sudjelovanje u raspravama;
4. pravo na naučno istraživanje, objavljivanje i razmjenu rezultata istraživanja u mjeri u kojoj je to u skladu sa Statutom Univerziteta (u daljem tekstu: Statut) zakonima i propisima;

5. pravo na objektivan i pravedan postupak vrjednovanja rada studenata;
6. pravo na zaštitu od nasilja, prinude i prijetnji primjenom sile;
7. pravo na zaštitu od diskriminacije i uznemiravanja na temelju religijske, etničke i nacionalne pripadnosti, rase, spola, spolne orijentacije, imovinskog stanja, obiteljskog ili bračnog statusa, trudnoće, starosti, invalidnosti, tjelesnog izgleda, političkog opredjeljenja i zdravstvenog stanja;
8. pravo na sudjelovanje u mirnim, nenasilnim, prijavljenim protestnim postupcima ili demonstracijama u mjeri u kojoj oni ne krše prava drugih članova fakultetske zajednice;
9. pravo na zaštitu od bilo koje vrste ilegalnih i neovlaštenih ispitivanja ili n istraživanja;
10. pravo na zaštitu od traženja osobnih podataka koji nisu na direktan način vezani uz nastavni proces;
11. pravo na primjenu jednakog i pravednog postupka utvrđivanja utemeljenosti optužbi za povredu propisa Univerziteta;
12. pravo na izbor i ustanovljavanje predstavničkih, demokratskih organiziranih studentskih organizacija koje su odgovorne akademskoj zajednici studenata
13. pravo studentskih organizacija na zastupanje stava koji je donesen primjerenim postupkom odlučivanja unutar akademske zajednice;
14. pravo na obavještanje i blagovremeno informiranje o pravilima i propisima Univerziteta;
15. pravo studentskih organizacija na prijem kod ovlaštenih osoba Univerziteta radi iznošenja stavova studenata koje zastupaju;
16. pravo na evaluaciju rada nastavnika, saradnika i kvalitete nastavnog rada;
17. pravo slobodnog izbora načina ponašanja sve dok svojim ponašanjem ne krše zakone i pravila utvrđena Statutom Univerziteta;
18. pravo na upotrebu imovine uz saglasnost Univerziteta, bilo kao pojedinaca ili članova/članica studentskih organizacija, za izvannastavne aktivnosti kojima je cilj zadovoljiti akademske i studentske potrebe u mjeri u kojoj nisu u suprotnosti s propisima i pravilima Univerziteta;
19. pravo zadržavanja nepromijenjenog statusa, prava i privilegija članova/članica akademske zajednice tokom trajanja disciplinskog postupka, osim u slučajevima u kojima predstavljaju prijetnju za sigurnost i dobrobit ostalih članova/članica akademske zajednice te za imovinu Univerziteta.
20. ostala prava koja su definisana Statutom Univerziteta i zakonom

III Akademska nepoštovanje

Član 4.

- (1) Akademska nepoštovanje ugrožava kvalitet nastavne i naučne djelatnosti Univerziteta i obezvrjeđuje njegova istinska dostignuća.
- (2) Bilo koja vrsta prevare vezane za postupak prijavljivanja, ispitivanja ili druge vrste provjere znanja predstavlja povredu ovog Etičkog kodeksa, što uključuje, a nije ograničeno samo na sljedeće:
 1. pribavljanje, prenošenje, primanje, upotreba ili namjera upotrebe ispitnih materijala bez dopuštenja ovlaštenih osoba, kao i ispitnih rješenja;
 2. upotreba ili namjera upotrebe bilješki, podataka, računala ili drugih elektronskih naprava ili programa za vrijeme ispita ukoliko nije dopuštena;

3. lažno predstavljanje i predstavljanje tuđeg rada kao svojeg;
4. upotreba već ocijenjenih radova u cilju ponovnog ocjenjivanja na istom ili drugom kolegiju bez odobrenja nastavnika;
5. mijenjanje ili namjera prepravljivanja ocjene ili rezultata vrednovanja ispita ili izvještaja s drugih provjera znanja;
6. namjerno uništavanje akademskog rada ili napora drugih studenata.

(3) Povredu ovog Etičkog kodeksa također predstavlja:

1. plagiranje i krivotvorenje radova ili dijelova radova drugih osoba te iznošenje ideja drugih osoba kao vlastitih, bez znanja autora ili navođenja izvora;
2. proizvođenje, upotreba, krivotvorenje, printanje, reproduciranje, kopiranje, izmjenjivanje, premještanje ili uništavanje bilo kojeg akademskog materijala, fakultetskog spisa, dokumenta ili identifikacijske isprave bez dopuštenja ovlaštenih osoba;
3. stvaranje situacija u kojima će drugi studenti biti nepravilno zaklinuti za akademska dobra ili u kojima student stvara nepoštenu akademsku prednost pred drugim studentima;
4. uticanje ili pokušaj uticanja na nepristranost vrednovanja nastavnika ili Fakultetskih tijela koje provode vrjednovanje;
5. javno zastupanje ili predstavljanje Univerziteta, studentske organizacije (u daljem tekstu Unija studenata i studentske organizacije fakulteta) ili drugog člana akademske zajednice bez dopuštenja ovlaštene osobe;
6. javno iznošenje neprovjerenih i/li netačnih podataka o drugim studentima, te o ostalim članovima akademske zajednice;
7. namjerno ometanje ili prekidanje nastave, istraživanja ili drugih akademskih aktivnosti, bez saglasnosti ovlaštenih osoba;
8. neovlašteni pristup, krađa ili uništavanje intelektualnog vlasništva;
9. umnožavanje ili upotreba logotipa ili žiga Univerziteta, logotipa i žiga Studentskih organizacija Univerziteta (Unija studenata i studentske organizacije fakulteta) bez dopuštenja ovlaštene osobe;
10. prodaja i upotreba cigareta, opojnih droga i/ili alkohola u prostorima koje Univerzitet posjeduje, koristi ili kontrolira;
11. namjerno onemogućavanje ulaza, izlaza ili ometanje normalne upotrebe objekata Univerziteta;
12. ostajanje ili zadržavanje u bilo kojem objektu Univerziteta nakon propisanog vremena;
13. unošenje oružja, eksplozivnih naprava, opasnih hemikalija u bilo koji objekt koji je pod kontrolom i nadzorom Univerziteta;
14. namjerno iznošenje netačnih i/ili neprovjerenih informacija s ciljem lažnog uzbunjivanja bilo kojeg člana akademske zajednice;
15. zloupotreba softverskih sistema ili tehnoloških resursa za nedopustive svrhe;
16. neodazivanje na pozive vezane za provedbu disciplinskog postupka, te bilo kakvo ometanje provedbe disciplinskog postupka;
17. namjerno pomaganje, poticanje ili unajmljivanje druge osobe u činjenju neke radnje koja se smatra povredom ovog Etičkog kodeksa studenata;
18. posjedovanje, davanje drugoj osobi, izrada ili sudjelovanje u izradi ključa ili drugog sredstva koje omogućava pristup objektima ili imovini fakulteta bez dopuštenja ovlaštenih osoba.

IV Završne odredbe

Član 5.

- (1) Univerzitet i Unija studenata imaju obavezu osigurati nužne uvjete kako bi svi studenti bili upoznati sa sadržajem Etičkog kodeksa za studente.
- (2) Za sve ostale odredbe koje nisu definirane ovim Etičkim kodeksom studenata važe Statut Univerziteta zakon i drugi opšti akti.
- (3) Etički kodeks stupa na snagu danom donošenja i objavom na oglasnim pločama i web stranici Univerziteta.

Član 6.

Ovaj Kodeks stupa na snagu danom donošenja i objavit će se na VEB stranici Univerziteta.

UNIVERZITET U TUZLI
S E N A T

Broj: 03-2771-2.1/13
Tuzla, 03.04.2013.godine

PREDSJEDNIK SENATA

Dr. sc. Enver Halilović, redovni profesor